

Nā Kahu Manō: He ‘Ohana Hawai‘i E Ho‘i I Ko Lākou Ho‘oilina Pono‘ī

Ke paipai aku nei kekahi makuakāne a me kāna keikikāne i nā ka‘ina hana kūpono i ka mo‘omeheu ma ka noi‘i ‘imi na‘auao i nā manō. E ho‘olohe anei ke Kulanui o Hawai‘i?

BY MARCEL HONORE / APRIL 29, 2021

Kā ka luna ho‘oponopono nota: *Unuhi ‘ia na [Ākea Kahikina](#). Click [here](#) to read this article in English.*

Ma kekahi holoholo aku nei ma waho pono o ke kapakai ‘o Kona, aia ‘o Michael Nakachi lāua ‘o kāna keikikāne ‘o Kaikea e ho‘okū ana i ko lāua moku i ka lā kakahiaka ma waho o ke awa ‘o Honokōhau, a hai lāua i mau ho‘okupu ‘o ka lau kī i kai ma mua o ka ‘au ‘ana aku i mua.

‘O ka makuakāne Nakachi, ua hai ‘o ia i ka manakō i wahī ‘ia i ka lau kī i ‘ō aku o ka ‘ao‘ao. ‘O ka hua, no kekahi lā‘au mai ua hua nei ma ka hale o kona makuakāne. ‘O Ling ka makuakāne ali‘i, a ua hala aku nei ‘o ia ma Mei.



Ua puehu nā mōhai ma ka ‘ilikai. A ‘a‘ohe i li‘uli‘u, ua puka mai kekahi mau manō a ‘au aku ua mau manō nei a puni nā lau, ‘oiai lākou e nīele ana i nā mea pa‘upopo. A hala ma kahi o ho‘okahi minuke, ua nalowale iho lākou ma lalo o ka ‘ilikai.

‘A‘ole kēia launa ‘ana he ūlialia. Ua kama‘āina loa nā Nakachi i kēia kai,

a maopopo le‘a iā lāua kahi e ‘imi ‘ia ai nā i‘a. He mau mamō lāua a nā kahu manō, a ma kēia mau makahiki e holo ana lākou e ho‘opili hou ai i ka ho‘oilina a ko lāua ‘ohana.

E ho‘āno hou malū ana nā Nakachi i ka hana ku‘una o ko lāua kūpuna me kekahi ka‘ina hana ‘ānō, ‘o ia ho‘i ka hana e ho‘okomo ‘ia ai ka noi‘i nohili ma ke kai. Ua hana lāua pēlā, wahi a lāua, me ka ‘āpono ‘ia ‘ana e nā ‘ohana kama‘āina kaulana ma ka mokupuni.



Aia ‘o Michael Nakachi ma ka ‘ao‘ao hema, a me kāna keikikāne e kilo ana i kai ma waho a‘e o Kona.

“Ho‘ā‘o nui māua e lu‘u kai, ke hiki, no ka ho‘opili ‘ana i nā i‘a ma o ka lu‘u kini ea, ka lu‘u kini ea ‘ole, ka lu‘u kini ho‘ēa hou, nā ‘enehana like ‘ole,” wahi a Michael Nakachi, i piha ka makahiki kanalimakūmālima iā ia, a he kāne i hānai ‘ia ma Waimānalo. No Maui kona mo‘okū‘auhau. “A no ka hapanui o nā Kānaka, e aho e ho‘opili aku i kēlā. Pehea kākou e ho‘ohana ai i nā mea...e hō‘oia ‘ia ai nā mea a nā kūpuna i ‘ike ‘ē aku ai?”

‘A‘ole na‘e i like me ke ka‘ina hana haole, ‘o kā lākou ka‘ina hana, he mea e kāko‘o ‘o‘ole‘a i ka hana “non-invasive.” ‘A‘ohe kīlou, ka hei, a me ka ho‘opili ‘ana i nā manō e pilikia ai lākou, [a i](#)

[‘ole nā hana e make ai lākou.](#)

Ma kahi o kēia, ‘o Kaikea, ‘o ia ka mea nāna e hele kula nei e loa‘a ai ke kēkelē laeo‘o no ka [tropical conservation biology and environmental science](#) ma ke Kulanui o Hawai‘i ma Hilo. E noi‘i nohili ‘o ia i nā manō a me nā i‘a kai ‘ē a‘e ma kai o Hawai‘i Komohana ma o nā pa‘i ki‘i a me nā pa‘i wikiō he kaukani a ‘oi, ‘o ia ka mea āna e hana aku ai. E ho‘ohana ana ‘o ia i kēia mau mea no kāna palapala laeo‘o āna e ho‘opau ai paha ma ka hopena o ka makahiki. Kūkulu ‘ia ia mea i ka “encounter history” e hahai pono ai kekahi mau manō kiko‘ī wahi a ka hi‘ona, a me ka noho ‘ana a me ka ha‘alele ‘ana i kahi ma‘amau.

‘O kāna waihona ki‘i, he ‘elua terabytes ka nui o ka mea ma loko, a ua ho‘ohui ‘ia ho‘i ka mo‘olelo o kā lākou ho‘omau keiki ‘ana a me ka “fishery interactions.” ‘O ia ho‘i, he mea ia e ho‘opalapala i nā manawa e kīlou ‘ia a hei ‘ia ai kēia mau manō me nā mākau, nā aho, a me nā ‘enehana ‘ē a‘e e hihia ai ka manō. Me ka ho‘ohana ‘ia ‘ana o ka ‘enehana lolo uila, kuhi pono a‘e ‘o ia i ka nui o ka lāhui manō kama‘āina, ma o ka nāna ‘ana i nā manō kiko‘ī āna e noi‘i aku nei.

‘O ke kilo ka mole o ka hana — “e aho e hana e like me ka makemake a me ka ‘olu‘olu o ka manō, ‘a‘ole e like me ko ka mea noi‘i,” wahi a Kaikea, a ua like nō ia me ke kuleana a ke kahu manō ma ka nohona Hawai‘i ma mua o ka ho‘olauna mua me ka po‘e haole.

“‘Ōlelo ka po‘e, “‘o ka ‘epekema i kū‘ē i ka mo‘omeheu,’ akā ma kekahi mau manawa he nui, ‘o ka mo‘omeheu ka ‘epekema,” i ‘ōlelo aku ai ‘o Kaikea ma kekahi holoholo ma ‘Aukake. ‘O ke kahu manō, ‘o ia ka mālama manō ‘ana. Ua kama‘āina loa kekahi i kekahi. Me ka ‘ole o kēia kama‘āina, pehea e hō‘oia ai i ka manō, pehea e hea inoa ai, a pehea e ‘ike le‘a i kona mo‘okū‘auhau? ‘O ka ha‘ina, ‘o ia ka wā, ke kilo, a me ka maopopo.”

E kaomi i nā ki‘iona e a‘o ai i nā mea ‘ē a‘e e pilina i nā Nakachi a me ko lāua huaka‘i ma ke kapakai.

Ua pa‘akikī na‘e ka hō‘ike ‘ana i kona kuana‘ike i ka ‘ōnaehana ‘imi na‘auao kama‘āina. ‘O ke ka‘ina hana a nā Nakachi e hō‘ihi ‘ia ai ka mo‘omeheu, he kū‘ē pololei nō ia i ke ka‘ina hana a ke Kulanui o Hawai‘i ma ka noi‘i manō, ‘o ia ho‘i he hana e ‘āpono ‘ia ai ka ho‘opilikia ‘ia a me ka make ‘ana o nā manō.

lā iā e ho‘omaka ana i i kāna kēkelē laeo‘o, ua kūlike‘ole ‘o ia i kāna luna kōmike, wahi āna. Ua hala kekahi mau makahiki ma mua o ka ‘imi ‘ana i kōmike polopeka kūpono e kāko‘o ‘ia ai kāna palapala laeo‘o.

A ua ho‘opa‘apa‘a ho‘i nā Nakachi me nā mea noi‘i nui mai UH mai no [nā kānāwai](#) e ‘imi i nā pono e kia‘i ‘ia ai nā manō i nā kahakai moku‘āina. ‘Ōlelo lāua, he pono ka ho‘okomo ‘ia ‘ana o kēia mau palena ma hope o ka ‘ike ‘ana i nā pilikia nui ma ka ho‘opili manō ‘ana a ke kanaka ma ko lāua huaka‘i ma‘amaui ‘ana, a me ka ‘ike ‘ana i ke emi ‘ana o nā po‘ii‘a kihi ki‘eki‘e ma ke kai a lāua e kilo ai.

Akā, wahi a ka mea noi‘i, e la‘a ‘o Kim Holland, ‘o ia ka mea nāna i ho‘okumu i ka hui ‘o Shark Research Group at the Hawaii Institute of Marine Biology ma UH, e ho‘opilikia ana ua kānāwai hou nei i kā lākou hana ma o [ka hana pākulekele mākoeā](#), a he mea e ālai ‘ia ana ka holomua ‘ana o ka noi‘i, a ‘o ka hō‘eha ‘ia maila nō ia o ka manō no nā makahiki he nui.

‘Ōlelo ka makua Nakachi, ‘a‘ole maopopo i kēlā mau mea noi‘i ka lōina ku‘una o ka Hawai‘i, ‘o

ia ho‘i ke ko‘iko‘i o ka noi a me ka ‘ae ‘ia ‘ana ma mua o ke komo ‘ana i kekahi wahi.

“Ua hana lākou i nā mea maika‘i he nui,” i kuhi aku ai ‘o Michael, akā “‘a‘ohe kūkākūkā. ‘A‘ohe noi no ka hana ‘ana. ‘A‘ohe walohia i ka i‘a. Ua pili wale i ka noi‘i a me ka ‘ikepili.”

‘Ike Ku‘una, Noi‘i Kilo

lā Kaikea e kālele ana i kāna noi‘i, mālama kona makuakāne i kona mo‘okū‘auhau kahu manō ma ke ‘ano he kia‘i maluō kahakai kūpa‘a nui.

He kanaka nui ‘o ia ma nā paio kama‘āina no [ka lawai‘a hale hō‘ike‘ike i‘a](#), a ua ho‘okomo ‘o ia i ka hana kāmāwai i loa‘a ai ka hopena ma ka Supreme Court e kū‘ē aku i ua hana nei ma Hawai‘i Komohana.

Ma kēia kau kupulau, ua ho‘okomo ‘o ia i [kekahi hihia kāmāwai ‘ē a‘e](#) ma ke ‘ano he kanaka ho‘omau mo‘omeheu. Na kēia hana e alaka‘i i [mau palena e ‘oi aku ai ka ikaika](#) no [ka manō lālākea](#), he lāhui i luku ‘ia ma kēlā mau kekeke i hala aku nei ma muli o ka lawai‘a puni kālā.

Ua kapa ‘ia he “cruiser” e nā kāmaka i kama‘āina i kēia manō — he manō moana e holo aku i mau ana mamao loa, a e kāohi ‘ia ka luhi e kona ‘ēheu nui a me ka hahai māmā i ka i‘a pio e ‘au ana kokoke i ka ‘ilikai.

‘O ka hi‘ona liliuewe i ‘oi aku ai kēia lāhui manō ma ke ‘ano he po‘iia kelakela ma ka wā i hala, ‘o ua hi‘ona nei ka mea like e alaka‘i ana i ka lāhui i ka make loa ‘ana. Ho‘omake lehulehu ‘ia ka lālākea ma ke ‘ano he “bycatch” ma ka lawai‘a puni kālā, ua kīlou ‘ia a hei ‘ia ma nā aho lō‘ihi loa a me nā ‘upena nui.

Ua hala ‘ekolu haneli kaukani mau lālākea a ‘oi ma ke ‘ano he bycatch ma nā ‘upena nui lehuhelu ma Hawai‘i a me Sāmoa ‘Amelika mai ka makahiki 2013 aku, a ua mana‘o ‘ia, ua emi iho ka nui o ka lāhui he 95% mai ka waena o ke kekeke 1990 aku, wahi a kekahi ho‘olaha mai

ka hui kāmāwai kumuloa‘a ‘ole ‘o Earthjustice.



‘Au ka lālākea ma kahakai Hawai‘i ma ka pa‘i ki‘i na Kaikea Nakachi, he ‘āpana o ka waihona ‘ike nui āna i kūkulu aku ai no kāna noi‘i a me ka hana e mālama i ka ho‘oilina o kona ‘ohana ma ke ‘ana he kahu manō.

‘O ko Nakachi hihia kāmāwai i hala aku nei, i hana ‘ia me Earthjustice lāua ‘o [ke Conservation Council for Hawaii](#), ua hō‘eu ia mea i nā luna pekelala e ‘ike a ho‘omaopopo i ka lawai‘a ‘ino ‘ia ‘ana o ka lālākea. I kēia manawa, ‘o Western Pacific Regional Fishery Management Council, a i ‘ole ‘o [Wespac](#), he makahiki ko lākou e haku i papahana e kia‘i pono i ka lāhui lālākea.

Kūkākūkā ‘o Wespac i ka pono no ka hana ho‘ēmi ‘ana ma ko lākou hālāwai nui i kēlā pule aku nei, ‘o ia ho‘i ‘o ka ho‘ololi ‘ana i nā ‘enehana a me nā ka‘ina hana kūpono.

“Mana‘o mākou, ‘o lākou he hui i hoihoi i ka ‘ili o ke kai. ‘A‘ole lākou e lu‘u hohonu e hahai i ka mūhe‘e,” i ‘ōlelo aku ai ‘o Holland o ko UH Shark Research Group no ka lālākea. “‘A‘ole i

mōakāka ko mākou ho‘omaopopo ‘ana i ka laulā o ko lākou hoihoi a me ka hana.”

Me ka ma‘amau, no ka mālama a me ke kia‘i pono i nā lāhui manō, he pono ka hahai ‘ia ‘ana o lākou, wahi a Holland. A inā e hahai ‘ia ana lākou, he pono ka ho‘opa‘a ‘ia ‘ana o ka mīkini hahai iā lākou.

No kēlā hana, he pono ke ka‘ina hana pilikia a nā Nakachi e kū‘ē aku ai, keu ho‘i ke kīlou a me ka hopu ‘ana i ka i‘a, ho‘ohuli aku iā lākou me ka ‘ōpū i luna e kūnāhihi ai lākou, a i kekahi mau manawa, ‘o ke kaha ‘ana e ho‘okomo ‘ia aku ai ka mīkini hahai i loko.

Ua ‘ōlelo ‘o Holland, ma kahi o nā manō he mau haneli a kona hui i ho‘opa‘a ai i mīkini hahai ma kēlā mau kekeke i hala aku nei, ua hala nā manō he li‘ili‘i ma ke ka‘ina hana. Ua wehewehe ‘o ia, ‘o ka hala ‘ana he hana kāka‘ikahi nui loa ia.

“He hō‘ihi nui ko mākou i nā i‘a...a ‘o ia nō paha ka mea e nalowale ana,” i ‘ōlelo aku ai ‘o Holland.

Ua ho‘opakele aku ke ka‘ina hana i nā manō he mau kaukani, wahi a Holland. Iā lākou i hō‘oia ai i ka laulā loa o ka ‘au ‘ana o ka manō niuhi, ua ho‘oulu ‘ia ka moku‘āina e ho‘oholo i mau kulekele e kū‘ē aku i ka ho‘omake manō ma hope o ka nahu ‘ia ‘ana o ke kanaka.

“He wahi ko ke pākaukau no ka ‘ike ku‘una, ka noi‘i kilo a nā Nakachi e paepae aku ana, a me ka ‘epekema ‘ānō,” i ‘ōlelo aku ai ‘o Holland. Akā, ‘a‘ole hiki na‘e ke loa‘a mai ka ‘ikepili ma o ka ‘ike maka wale ‘ana.”

Pane ‘o Kaikea, hiki i nā akeakamai haole ke haku a hana i ka‘ina hana e ho‘ēmi i ka ho‘opilikia manō a e ho‘onui i ka hō‘ihi mo‘omeheu no ka hahai manō ‘ana, a e emi iho auane‘i ka nui o ka hala ‘ana o ka manō.

‘O ka hopu ‘ana, wahi āna, ua ‘oi aku ka pa‘akikī, ka luhi, a me ka pipi‘i ma ua mau hana nei. He la‘ana kēia, hiki i nā kānaka noi‘i ke ‘ō a i ‘ole e hana i pū ‘ō e kī ‘ia ai ka mīkini hahai i loko

o ka manō me ke kīlou ‘ole iā lākou. E hemahema ana nō paha kekahi o ka ho‘ā‘o, a e nalowale ana ho‘i kekahi o ka mīkini hahai pipi‘i, akā he hana ia i ‘oi aku ka maika‘i no ke olakino a me ka pono o nā manō, wahi āna.

‘O kona mau kilo ma kona ‘au‘au ‘ana i ka moana me nā lāhui i‘a ‘ē a‘e, e la‘a ka niuhi, he pilikia ana nō paha ko laila, akā ‘ōlelo na‘e ‘o Kaikea, ua pale ‘ia kēia pilikia i kona ‘ike a me kāna i ‘alo ai.

“He palena ‘ole ko ‘one‘i ke haku ‘ia kekahi mea hou,” wahi a Kaikea. “He mau mana‘o a he mau koho like ‘ole ko laila, akā ma kahi o ka ho‘opa‘a ‘ana i ka mana‘o lehulehu e ma‘alahi ai a e ‘u‘uku ai ka hana, he pono ka haku ‘ana i mau hana ‘oko‘a, a e kau nō i ka pono o nā manō i luna o nā mea ‘ē a‘e ma kā lākou noi‘i.”

He Ka‘ina Hana Ho‘opau I‘a

Ua ‘ōlelo ‘o Kaikea, ua launa aku ‘o ia me kekahi mau kuana‘ike like ma kona wā e noi‘i ana i ka ‘epekema kai ma ke ‘ano he haumāna laepua ma Florida, kahi a lākou e mana‘o ai, inā loa‘a kekahi manō i hala ma ka ‘upena o ke kanaka noi‘i, he wahi mea ana ia i hiki ke noi‘i ‘ia.

Ma hope o kona hemo kula a me ka ho‘i ‘ana i kahakai Hawai‘i, “o ka ho‘ololi nui loa, ‘a‘ole ia ke kumu, akā, ‘o ia ka ho‘ololi ‘ia ‘ana o ka po‘e e ho‘ohana ana i ke kai a me ke ‘ano o kā lākou hana.”

‘Ōlelo nā Nakachi, ua hopohopo lāua i ka māhuahua ‘ana o ka launa manō ‘ana e holo ana ma ka moana, kahi a nā kānaka ‘au moku e palu pinepine ai i nā i‘a i ka ‘ilikai a e ho‘ololi i ko lākou ‘ano ma‘amau i hiki i nā malihini ke pa‘i ki‘i no kā lākou social media.

Hopohopo pū ho‘i lāua i nā launa ‘ē a‘e e ho‘opilikia i nā i‘a, a me ka ‘u‘uku loa o ka nui o nā māka‘i mai ko ka moku‘āina Department of Land and Natural Resources i hiki ke nānā a mālama i ke kapakai holo‘oko‘a o Hawai‘i Komohana.

Ma ko lāua huaka‘i ma ‘Aukake, ua holo kai nā Nakachi i wahi i kaulana i ka lehulehu no nā manō ‘o grey reef shark. I laila ‘ē kekahi lawai‘a ‘ōpelu i malihini i kēlā wahi.

Holoholo nā lawai‘a ‘ōpelu loea i mau wahi ‘ē a‘e, no ka mea, ‘a‘ole lākou makemake e kia‘i i ka i‘a ma ka ‘upena i nā manō e ‘au ana, wahi a lāua. Iā nā Nakachi e hiki aku ana, ua ha‘alele koke ka lawai‘a.

Iā Kaikea e lu‘u ana i kai, ‘a‘ohe manō e ‘au ana ma kēlā wahi ma‘amaui, ‘oiai paha he ‘au kō nui ko lalo o ke kai.

Akā nō na‘e, ua ‘ike ‘o Kaikea i ho‘okahi manō ‘ōpiopio e kapalili a e make ana ma ka papakū. ‘O ka mea i hana ‘ia i ka manō, he mea i hana aku nei iā iā, wahi āna.

Ho‘ohuoi lāua, ua pili ua hana nei i ka lawai‘a, ‘o ia ka mea i waiho aku i ka manō i kona wā e pilikia ana, a ‘a‘ole hiki iā ia ke ola hou. Ua napenape ka ‘ōpū ke‘oke‘o, a kū‘oko‘a ia ma ka pōhaku uliuli o ka papakū. ‘A‘ole i hiki iā Kaikea ke lu‘u iho ma muli o ke kō nui o ke kai no ka nānā pono ‘ana aku.

Ua ho‘opilikia kēlā hō‘ike i nā Nakachi no ke koina o ka lā. Ua mihi ‘o Michael i ka lawe ‘ole ‘ana i nā kini ea a me ka mea pono no ka lu‘u kai e kāko‘o iā lāua i ka ho‘omaopopo ‘ana i ka mea i hana ‘ia.

“He kaumaha nui ke mahalo ‘ia aku ‘o Kanaloa pēlā,” wahi a Nakachi e kuhi ana iā Kanaloa, ke akua ku‘una o ke kai. “He ka‘ina hana ho‘opau i‘a.”

Ka ‘Imi A Loa ‘a O Ka Ho‘oilina

Ho‘ā‘o nā Nakachi e huaka‘i a nānā i luna a i lalo o ke kapakai i mau manawa ma kēlā me kēia pule. Hiki iā lāua ke hele pinepine pēlā, wahi a Michael Nakachi, ma muli o Moana Ohana, he

hui moku pilikino āna e kōkua aku ai i ka ho‘oholo ‘ana.

Kāko‘o kālā nā lālā i ka hana mo‘omeheu, a hā‘awi ke kumu ‘oihana iā māua i ka hiki ‘ana ke hana a mālama kuleana, wahi āna.

Ua ‘ōlelo ‘o Nakachi, ‘a‘ole i ‘ike lākou ‘o kona ‘ohana i ko lākou mo‘okū‘auhau kahu manō a hiki i ka ha‘i ‘ana a ka hoa hānau o kona kupunawahine iā lākou, ‘o ia ho‘i ‘o Pilahi Paki, he kupuna i kaulana i ke kākau ‘ana iā [Hawaii’s Aloha Spirit Law](#), ma kekahi ho‘ohui ‘ohana ma ‘Aiea ma ka mahele mua o ke kekeke 1970.

Ua ‘ākoakoa mai lākou ma hope o ko kona makuakāne ‘ane‘ane nalowale ‘ana ma kai, ‘o Ling kona inoa. Ua ho‘opakele ‘ia lāua o kekahi lālā ‘ohana ‘ē a‘e ma hope o ka hala ‘ana o kanakolu mau hola, ma hope o ka ho‘okahuli ‘ia ‘ana o ko lāua moku lawai‘a e ke kai pikipiki‘ō ‘o Kaiwi ma ‘ō aku o O‘ahu, wahi a Nakachi. Ua hala kekahi lālā ‘ohana ‘ē a‘e ma ke kai.

Wahi a Nakachi, ua nīnau aku ‘o Paki iā Ling inā ua ‘ike ‘o ia i mau manō e pili kokoke ana iā lāua ma ke kai, a ua pane ‘o ia, iā lāua e ‘auana ana ma ka ‘ilikai, ua maopopo iā ia kekahi kū ‘ana o kahi mea kokoke e mālīe ai ka na‘au, a ua ‘ike ho‘i ‘o ia i kekahi manō nui e ‘au aku ana kokoke iā lāua.

“Ua uē nui koke ‘o ia,” i ha‘i mo‘olelo aku ai ‘o Nakachi e pili ana iā Paki

ma ka ‘ākoakoa ‘ohana ‘ana. “He mihi ko ‘one‘i i ko‘u kū ‘ole ‘ana ma laila a me ka nele o ko‘u wehewehe ‘ole ‘ana iā ‘oukou e pili ana iā kākou iho a me ka piko a kākou e ho‘i aku ai.”



Courtesy: Michael Nakachi

Ua hala loa ‘o Ling Nakachi ma Mei. Ua nalowale ‘o ia ma ke kai ma ke kekeke 1970, a na kēlā mea e alaka‘i i ka ‘ohana e a‘o hou i ko lākou mo‘olelo piha.

Ua ha'i aku 'o ia i ko lākou pilina 'ohana nui i nā i'a, a me ka mo'okū'auhau o ke kahu manō mai Maui mai. Ua nalowale ka hapanui o kēlā ho'oilina i ka hala 'ana o ko Michael kupunawahine, 'o ia ka mea nāna i hala ma ka wā a Ling e kamali'i ana, wahi āna.

I kēia wā 'ānō, kūlia nā Nakachi e ho'omaopopo le'a i ka mea e pono ai ke kahu manō i kēia wā e holo nei. 'O kāna kaikamahine 'o ['Alohi](#), he haumāna lae'ula 'o ia e noi'i ana i ke coastal marine management.

“No'u iho, e ho'okomo wau i kēlā wahi ma kēlā me kēia manawa e a'o hou 'ia ai kēlā 'ike,” i 'ōlelo aku ai 'o Kaikea.

“Ke ho'ā'o nei mākou e haku i ko mākou mo'olelo pono'ī me ko kākou ho'omaopopo 'ana i kēia wahi, a hiki wale nō ke loa'a mai kēlā ma o ke ku'upau 'ana o ka hana a me ka manawa.”

Ua kāko'o 'ia kēia papahana e ko Harry Nathaniel 'Ohana, Levani Lipton, lāua 'o Lisa Kleissner.

About the Author



Marcel Honore

Marcel Honore is a reporter for Civil Beat. You can email him at mhonore@civilbeat.org

[Use the RSS feed to subscribe to Marcel Honore's posts today](#)

Before you go

Civil Beat is a small nonprofit newsroom that provides free content with no paywall. That means readership growth alone can't sustain our journalism.

The truth is that less than 1% of our monthly readers are financial supporters. To remain a viable business model for local news, we need a higher percentage of readers-turned-donors.

Will you consider becoming a new donor today?

CONTRIBUTE

More Stories In This Special Report



PART 5

**Denby
Fawcett: Ka
Hala 'Ana i
kekahi Mea
'Ike Loa Aloha
Nui 'Ia**



PART 6

**Ma Muli O Ka
Hui Lawe Hana
I Noi 'Ia, Ua
Kupu 'Ē Mai
He Mau Pilikia**



PART 7

**'Ōlelo Nā
Kama'āina No
O'ahu
Komohana I
Ke Kuhihewa
A Ka Nūhou I
Ko Lākou
Kaiāpuni.
Makemake
Mākou E
Ho'ololi I Kēlā**



PART 8

**Nā Kahu
Manō: He
'Ohana Hawai'i
E Ho'i I Ko
Lākou
Ho'oilina
Pono'ī**

STAY UP TO DATE ON THE CORONAVIRUS AND OTHER HAWAII ISSUES

Sign up for our FREE morning newsletter

SIGN ME UP!

And don't worry, we hate spam too! You can unsubscribe any time.

[About Civil Beat](#) [Member Benefits](#) [Contact Us](#) [Events](#) [Jobs](#) [FAQ](#) [Got A Tip?](#) [Podcasts](#)
[Privacy Policy](#) [Reprint Policy](#) [Corporate Donations](#) [Terms of Service](#)

Copyright © 2010-2021 Honolulu Civil Beat Inc. All rights reserved. Civil Beat ® is a registered trademark of Honolulu Civil Beat Inc.